

**ZAKON O SUDSKIM TAKSAMA
BRČKO DISTRIKTA BOSNE I HERCEGOVINE**

Ovaj zakon objavljen je u Službenom glasniku Brčko distrikta BiH broj: 5/01

**Zakon je kasnije mijenjan zakonima o izmjenama i dopunama zakona
objavljenim u Službenim glasnicima Brčko distrikta BiH broj: 12/02 i 23/03 i te
izmjene nalaze se iza teksta ovog zakona**

Na osnovu člana 23 Statuta Brčko Distrikta Bosne i Hercegovine, Skupština Brčko Distrikta Bosne i Hercegovine na 20-oj sjednici održanoj 30. aprila 2001. godine, usvaja

ZAKON O SUDSKIM TAKSAMA

I - OPŠTE ODREDBE

Član 1

U postupku pred Osnovnim i Apelacionim sudom Brčko Distrikta Bosne i Hercegovine (u daljem tekstu: Osnovni i Apelacioni sud) plaćaju se sudske takse (u daljem tekstu: takse) po odredbama ovog zakona i Taksene tarife koja je njegov sastavni dio.

Član 2.

- (1) Takse propisane ovim zakonom plaćaju lica po čijem prijedlogu ili u čijem interesu se preduzimaju radnje u ovom postupku, za koje je ovim zakonom utvrđeno plaćanje takse.
- (2) Za podneske i zapisnike koji zamjenjuju podneske taksu je dužno da plati lice koje ih podnosi, odnosno lice na čiji zahtjev se sastavlja zapisnik.
- (3) Za odluku Osnovnog suda taksu je dužan da plati tužilac, odnosno predlagač, a za sudsku nagodbu taksu su dužne da plate obje strane, ukoliko u nagodbi nije drugačije ugovoreno.
- (4) Za odluku Apelacionog suda i za odluku po vanrednom pravnom sredstvu, taksu je dužan da plati podnosilac žalbe, odnosno lice u čijem interesu je pokrenut postupak po vanrednom pravnom sredstvu.
- (5) Kada su u skladu sa odredbama ovog zakona taksu dužna da plate dva ili više lica zajedno, njihova obaveza je solidarna.
- (6) Lica iz stavova 1 do 5 ovog člana su takseni obveznici u smislu ovog zakona.

Član 3

Obaveza plaćanja takse (u daljem tekstu: taksena obaveza) nastaje:

- 1) za podneske (tužbe, odgovore na tužbu, žalbe i druga pravna sredstva) – kada se predaju sudu, odnosno kada se izvrši obračun takse, ako njen iznos zavisi od vrijednosti predmeta spora, a za podneske predate na zapisnik – kada je zapisnik sastavljen;
- 2) za sudske prijepise – kada se zatraže od suda;
- 3) za sudske odluke – kada se objave, a ako stranka nije prisutna objavljivanju ili ako odluka nije javno objavljena – kada se stranci ili njenom zastupniku dostavi prijepis odluke;
- 4) za sudske nagodbe – kada se zaključe;
- 5) za paušalnu taksu u postupku raspravljanja zaostavštine – kada rješenje o nasljeđivanju postane pravosnažno;

- 6) u postupku stečaja – kada rješenje-odluka o glavnoj diobi u postupku stečaja postane pravosnažna;
- 7) za ostale radnje – kada se zatraži njihovo preduzimanje.

Član 4

Taksa se plaća u roku od 8 dana od dana nastanka taksene obaveze, ako ovim zakonom nije drugačije određeno.

Član 5

- (1) Za podneske i odluke u upravnim sporovima u stvarima penzijskog, invalidskog i zdravstvenog osigranja, dječijeg dohotka, starateljstva, usvojenja i socijalne pomoći, taksa se plaća samo ako tužba bude pravosnažno odbijena ili odbačena.
- (2) Taksena obaveza iz stava 1 ovog člana nastaje danom pravosnažnosti odluke kojom je tužba odbijena ili odbačena.

Član 6

- (1) Takse predviđene Taksenom tarifom plaćaju se u gotovom novcu.
- (2) Takseni obveznik plaća taksu tako što iznos takse uplaćuje na propisani račun i potvrdu o uplati prilaže uz podnesak za koji je taksa plaćena. Kada se podnosi potvrda o uplaćenju taksi za sudsku odluku, takseni obveznik je dužan da na njoj označi broj odluke na koju se taksa plaća.

Član 7

- (1) Nedovoljno plaćena ili neplaćena taksa ne zadržava tok sudskog postupka, ako ovim zakonom nije drugačije određeno.
- (2) Ako takseni obveznik zahtijeva sud je dužan da primi podneske koji nisu taksirani ili su nedovoljno taksirani.
- (3) U slučajevima iz stavova 1 i 2 ovog člana taksa se naplaćuje u skladu sa odredbama člana 37 ovog zakona.

Član 8

Naplata takse zastarijeva u roku od tri godine po isteku kalendarske godine u kojoj je nastala taksena obaveza.

II – OSLOBAĐANJE OD PLAĆANJA TAKSE

Član 9

- (1) Od plaćanja takse oslobođeni su Brčko Distrikt Bosne i Hercegovine (u daljem tekstu: Distrikt), njegovi organi, kao i izdržavana lica u postupku zakonskog izdržavanja.
- (2) Takse za podneske i radnje ne plaćaju lica koja poklanjaju Distriktu, socijalno-humanitarnim, naučnim ili kulturnim organizacijama, ustanovama ili fondacijama svoju imovinu ili se u njihovu korist odriču prava svojine na nekretninama ili im bez naknade ustupaju druga stvarna prava na nekretninama.

- (3) Strana država je oslobođena plaćanja takse ako je to predviđeno međunarodnim ugovorom ili pod uslovom uzajamnosti. U slučaju sumnje o postojanju uzajamnosti, mišljenje daje Pravosudna komisija.

Član 10

- (1) Sud može osloboditi obveznika od plaćanja takse ako bi plaćanjem takse, imajući u vidu visinu sredstava iz kojih se obveznik i članovi njegovog domaćinstva izdržavaju, ta sredstva bila u tolikoj mjeri umanjena da bi time bila ugrožena njihova egzistencija,
- (2) Odluku iz stava 1 ovog člana donosi Osnovni sud na prijedlog taksenog obveznika. Prije donošenja odluke, sud će ocijeniti sve okolnosti, a naročito će uzeti u obzir vrijednost mjerodavnu za naplatu takse, ukupan prihod taksenog obveznika i članova njegovog domaćinstva, kao i broj lica koja takseni obveznik izdržava.
- (3) Pod domaćinstvom se u smislu ovog zakona podrazumijeva zajednica života, privređivanja i trošenja ostvarenih prihoda.
- (4) Izdržavana lica, u smislu ovog zakona su:
- 1) maloljetna lica, odnosno usvojenici,
 - 2) lica, odnosno usvojenici na redovnom školovanju ili na vanrednim studijama, ako su nezaposleni – do navršene 26 godine života,
 - 3) unuci, bez roditelja i ako žive u domaćinstvu sa obveznikom,
 - 4) bračni drug i
 - 5) roditelji, odnosno usvojitelji.

Član 11

- (1) Visinu prihoda taksenog obveznika sud utvrđuje na osnovu uvjerenja nadležnog organa, odnosno drugih dokaza koje takseni obveznik podnese o svom imovnom stanju.
- (2) Uvjerenje iz stava 1 ovog člana sadrži podatke o visini prihoda taksenog obveznika i članova njegovog domaćinstva, kao i o drugim izvorima prihoda i uopšte o imovnom stanju lica kome se izdaje uvjerenje.
- (3) Uvjerenje iz stava 1 ovog člana služi kao dokaz za oslobađanje od plaćanja takse samo ako od njegovog izdavanja do podnošenja prijedloga za oslobađanje nije proteklo više od šest mjeseci.
- (4) Uvjerenje iz stava 1 ovog člana podnosi takseni obveznik uz prijedlog za oslobađanje od plaćanja takse.
- (5) Sud može po službenoj dužosti pribaviti i provjeriti potrebne podatke o imovnom stanju taksenog obveznika i članova njegovog domaćinstva, a može o tome saslušati i protivnu stranku.
- (6) Protiv rješenja suda kojim se usvaja prijedlog za oslobađanje od plaćanja takse nije dozvoljena žalba.

Član 12

- (1) Strani državljanin oslobodiće se od plaćanja takse ako je to predviđeno međunarodnim ugovorom ili pod uslovom uzajamnosti.

- (2) U slučaju sumnje o postojanju uzajamnosti, mišljenje daje Pravosudna komisija.

Član 13

- (1) Oslobađanje od plaćanja takse dato u parničnom, vanparničnom i krivičnom postupku, kao i u postupku u upravnim sporovima važi i u postupku izvršenja odluka donijetih u tim postupcima, ako se izvršenje zahtjeva u roku od tri mjeseca po pravosnažnom okončanju postupka.
- (2) Oslobađanje od plaćanja takse u vanparničnom i izvršnom postupku važi i u parničnom postupku koji nastane u toku i povodom vanparničnog i izvršnog postupka.

Član 14

- (1) Rješenje o oslobađanju od plaćanja takse odnosi se na sve takse po odgovarajućem predmetu bez obzira kada je nastala taksena obaveza.
- (2) Ukoliko je pokrenut postupak za naplatu takse za podneske, radnje i isprave za koje je taksena obaveza nastala prije donošenja rješenja iz stava 1 ovog člana, postupak će se obustaviti, a taksa koja je bila naplaćena će se vratiti.

Član 15

Sud može u toku postupka ukinuti rješenje o oslobađanju od plaćanja takse ako utvrdi da je takseni obveznik u stanju da plati taksu, a tom prilikom će odlučiti da li će obveznik u potpunosti ili djelimično platiti takse od kojih je bio ranije oslobođen.

Član 16

Ako sudski postupak traje duže od dvije godine lice oslobođeno od plaćanja takse dužno je da po isteku druge i svake slijedeće godine trajanja postupka podnese novo uvjerenje o svom imovnom stanju.

Član 17

- (1) Staralac odsutnog lica čije je boravište nepoznato, staralac imovine čiji je sopstvenik nepoznat, kao i privremeni zastupnik stranke koga sud postavi u postupku, nisu dužni da plaćaju takse za lice koje zastupaju.
- (2) Naplata takse u slučajevima iz stava 1 ovog člana vrši se iz imovine lica koja se zastupaju.
- (3) Neplaćene takse sud će unositi u popis taksa i po završetku postupka postupiće kao u slučaju iz člana 37 stav 3 ovog zakona kada lice ne prisustvuje sudskoj radnji za koju je dužno da plati taksu.

Član 18

- (1) Oslobađanje od plaćanja takse koristi samo licu kome je to oslobađanje priznato.
- (2) Kada više lica zajednički predaju podnesak ili zajedno preduzmu radnju u postupku, a jedno ili više njih je oslobođeno od plaćanja takse, lice koje nije oslobođeno dužno je da plati taksu kao da nema oslobođenih od plaćanja takse, osim u slučajevima formalnog suparničarstva.

Član 19

- (1) Ako u parničnom i izvršnom postupku lice oslobođeno od plaćanja takse uspije u postupku, taksu koju bi ono bilo dužno da plati da nije bilo oslobođeno, platiće stranka koja ne uživa oslobađanje i to u srazmjeri u kojoj je oslobođena stranka uspjela u postupku.
- (2) Ako se između stranke oslobođene od plaćanja takse i stranke koja nije oslobođena zaključi sudska nagodba, taksu koju bi trebalo da plati oslobođena stranka platiće stranka koja nije oslobođena.

Član 20

- (1) Kada u postupku pred sudom učestvuju na jednoj strani lice koje je oslobođeno od plaćanja takse, a na drugoj lice koje nije oslobođeno, sud je dužan da vodi popis taksa koje bi trebalo da plati oslobođeno lice.
- (2) Popis taksi se zaključuje po završetku postupka. Ako se postupak završi na način predviđen članom 19 ovog zakona sud će shodno članu 37 ovog zakona izdati nalog za plaćanje takse.

III – UTVRĐIVANJE VRIJEDNOSTI RADI NAPLATE TAKSE

1. U parničnom postupku

Član 21

- (1) U parničnom postupku takse se plaćaju prema vrijednosti predmeta spora.
- (2) Ako ovim zakonom nije drugačije određeno, odredbe propisa o parničnom postupku na osnovu kojih se utvrđuje vrijednost spora primjenjuju se i prilikom određivanja vrijednosti spora radi naplate takse.

Član 22

- (1) Ako se jednom tužbom obuhvati više zahtjeva protiv tuženog, bez obzira da li se svi zahtjevi zasnivaju na istom činjeničnom i pravnom osnovu ili ne, vrijednost predmeta spora radi naplate takse određuje se prema zbiru vrijednosti svih zahtjeva.
- (2) U slučaju formalnog suparničarstva – ako više lica podnese jednu tužbu ili ako je više lica tuženo jednom tužbom, a predmet spora su zahtjevi, odnosno obaveze iste vrste koje se zasnivaju na bitno istovjetnom činjeničnom i pravnom osnovu, vrijednost predmeta spora radi naplate takse određuje se prema vrijednosti svakog pojedinog zahtjeva.

Član 23

Ako tužilac jednom tužbom obuhvati dva ili više tuženih i traži da tužbeni zahtjev bude usvojen prema slijedećem tuženom za slučaj da ne bude usvojen prema onome koji je u tužbi naveden prije njega ili ako prema svakom od njih postavlja isti zahtjev ili ako prema pojedinim od njih ističe različite zahtjeve koji su u međusobnoj vezi,

vrijednost predmeta spora radi naplate takse određuje se prema zahtjevu čija je vrijednost najveća.

Član 24

Ako je predmet spora pravo na zakonsko izdržavanje ili potraživanje pojedinih iznosa zakonskog izdržavanja, vrijednost predmeta spora radi naplate takse računa se prema zbiru davanja za tri mjeseca, ako se izdržavanje ne traži za kraće vrijeme.

Član 25

Ako je predmet spora nasljedno pravo na cijeloj zaostavštini, kao vrijednost predmeta spora uzima se vrijednost čiste zaostavštine, a ako je predmet spora samo jedan dio zaostavštine ili određena stvar iz zaostavštine, kao vrijednost predmeta spora uzima se čista vrijednost tog dijela, odnosno stvari.

Član 26

Vrijednost predmeta spora u svojinskim i državnim sporovima o nekretninama i u sporovima o pravu korištenja nekretnina, određuje se prema tržišnoj vrijednosti nekretnina koja je predmet spora, ali ne može biti manja:

- 1) za zemljište – od trostrukog iznosa katastarskog prihoda sa zemljišta,
- 2) za zgrade ili posebne dijelove zgrada – od trogodišnjeg iznosa stanarine, odnosno zakupnine, a ako ne postoji ugovor kojim se utvrđuje visina stanarine, odnosno zakupnine, ta visina će se utvrditi prema visini stanarine, odnosno zakupnine slične zgrade ili posebnog dijela zgrade u mjestu u kome se nalazi zgrada.

Član 27

(1) Kao vrijednost predmeta spora radi naplate takse uzima se:

- 1) u diobnim parnicama – vrijednost onog dijela imovine koji tužilac traži da mu se izdvoji diobom iz zajedničke imovine;
- 2) u parnicama u kojima je predmet spora izvršenje kakve radnje ili trpljenje ili nečinjenje ili izjava volje ili utvrđivanje da postoji ili ne postoji neko pravo ili pravni odnos ili da se utvrdi istinitost ili neistinitost kakve ispravke – iznos koji je tužilac označio u tužbi s tim da taj iznos ne može biti manji od 500 KM;
- 3) u parnicama za proglašenje prestanka važnosti ugovora o arbitraži – iznos od 500 KM;
- 4) u sporovima o otkazu ugovora o najmu ili zakupu stvari, o otkazu ugovora o korišćenju stana ili podstanarskog ugovora i u sporovima za iseljenje iz stana – iznos od 500 KM;
- 5) u sporovima o otkazu ugovora o zakupu poslovnih prostorija ili po tužbi za iseljenje iz poslovnih prostorija – jednogodišnji iznos zakupnine – ali ne manje od 500 KM;
- 6) u sporovima zbog smetanja posjeda – iznos od 500 KM;
- 7) u sporovima radi utvrđivanja ili osporavanja očinstva – iznos od 100 KM;
- 8) u sporovima radi utvrđivanja postojanja ili nepostojanja braka, poništenja ili razvoda braka – iznos od 200 KM;
- 9) u sporovima o stvarnim i ličnim službenostima i o doživotnom izdržavanju – iznos od 500 KM;

10)u sporovima o utvrđivanju reda prvenstva potraživanja u izvršnom postupku – visina potraživanja, a najviše 1000 KM.

- (2) Ako se zajedno sa brakorazvodnim sporom ili sporom radi utvrđivanja očinstva raspravlja i zahtjev za izdržavanje djeteta ili bračnog druga, naplaćivaće se samo jedna taksa i to prema vrijednosti prema kojoj se naplaćuje taksa za brakorazvodni spor, odnosno za spor za utvrđivanje očinstva.
- (3) Ako se u nekom od postupaka traži obezbjeđenje dokaza prije pokretanja parnice kao vrijednost mjerodavna za naplatu takse uzima se iznos od 100 KM.

Član 28

Ako se po odredbama članova 21 do 27 ovog zakona ne može utvrditi vrijednost predmeta spora, kao vrijednost se uzima iznos od 500 KM.

Član 29

- (1) Iznos takse, koju je takseni obveznik dužan da plati, obračunava u skladu sa odredbama ovog zakona lice koje odredi predsjednik suda.
- (2) Kontrolu obračunate i naplaćene takse vrši sudija koji vodi postupak, odnosno ovlašteno lice koje preduzima radnje.
- (3) Kontrola iz stava 2 ovog člana vrši se na taj način što sud po prijemu tužbe na brz i pogodan način utvrđuje vrijednost označenu u tužbi, kao i na osnovu nje određeni iznos takse. Ispitivanje vrijednosti spora sud će preduzeti najkasnije na pripremnom ročištu, a ako ono nije održano, na prvom ročištu za glavnu raspravu, prije početka raspravljanja o glavnoj stvari. Ako utvrdi da u tužbi nije označena odgovarajuća vrijednost spora ili ako utvrdi da taksa nije pravilno obračunata i naplaćena sud će rješenjem odrediti iznos takse, koju je takseni obveznik dužan da plati.
- (4) Kada se radi o naplati takse, tuženi može podnijeti prigovor da je u tužbi vrijednost predmeta spora previsoko određena u kom slučaju će sud rješenjem odrediti vrijednost mjerodavnu za naplatu takse i iznos takse koju je takseni obveznik dužan da plati.
- (5) Prigovor iz stava 4 ovog člana tuženi može istaći najkasnije do završetka pripremnog ročišta, a ako ono nije održano na prvom ročištu za glavnu raspravu, dok se sud nije upustio u raspravljanje.
- (6) Protiv rješenja iz stava 3 i 4 ovog člana nije dozvoljena posebna žalba.

2. U izvršnom postupku

Član 30

- (1) U izvršnom postupku plaća se taksa prema vrijednosti zahtjeva koji treba izvršiti ili obezbijediti.
- (2) Pri utvrđivanju vrijednosti zahtjeva za naplatu takse shodno se primjenjuju odredbe članova 21 do 28 ovog zakona.

- (3) Parnični troškovi, odnosno troškovi postupka i sporedna potraživanja uzimaju se u obzir samo ako su sami za sebe predmet zahtjeva koji treba izvršiti ili obezbjediti.
- (4) Ako je izvršnom postupku prethodila parnica o istom zahtjevu, kao vrijednost zahtjeva za naplatu takse u izvršnom postupku uzeće se vrijednost predmeta spora utvrđena u parnici, ako se ne zahtjeva manji iznos.

Član 31

Kada povjerilac ne naznači vrijednost mjerodavnu za naplatu takse, niti se ona može utvrditi na osnovu člana 30 ovog zakona, kao vrijednost se uzima iznos od 100 KM.

Član 32

U postupku izvršenja primjenjivaće se shodno odredbe člana 29 ovog zakona.

3. U upravnim sporovima

Član 33

- (1) U upravnim sporovima plaća se taksa prema vrijednosti predmeta spora, ako je predmet spora procjenjiv.
- (2) Vrijednost procjenjivog spora utvrđuje se shodno odredbama člana 21 do 28 ovog zakona.
- (3) Ako predmet spora nije procjenjiv, kao vrijednost se uzima iznos od 100 KM.

Član 34

U postupku u upravnim sporovima shodno se primjenjuju odredbe člana 29 ovog zakona.

4. U ostalim postupcima

Član 35

Kada je u vanparničnom postupku, u zemljišnoknjižnom postupku i u stečajnom postupku za plaćanje takse mjerodavna vrijednost zahtjeva, za njeno utvrđenje će se shodno primjenjivati odredbe člana 21 do 28 ovog zakona, ako u Taksenoj tarifi nije drugačije određeno.

Prema vrijednosti u toku postupka

Član 36

- (1) Prvobitno utvrđena vrijednost ostaje kao osnov za plaćanje takse, bez obzira da li se ta vrijednost promijenila u toku postupka.
- (2) Ako se u smislu člana 29 ovog zakona utvrdi nova vrijednost, kao osnov za plaćanje takse uzima se ta nova vrijednost i to od dana kada se rješenje suda o tome saopšti strankama.

- (3) Kada se vrijednost promijeni zbog preinačenja zahtjeva ili zbog toga što je zahtjev djelimično riješen, kao vrijednost za plaćanje takse uzima se promijenjena vrijednost i to za sve podneske i radnje učinjene poslije takve promjene.
- (4) Ako je izjavu o promjeni vrijednosti stranka dala u podnesku, taksa za taj podnesak plaća se po promijenjenoj vrijednosti.
- (5) Ako se pravnim lijekom, odnosno prigovorom protiv platnog naloga ili rješenja o izvršenju, odluka pobija samo u jednom dijelu, za plaćanje takse za pravni lijek, odnosno prigovor uzima se vrijednost samo pobijanog dijela.
- (6) Ako pravni lijek ulažu obje stranke, taksa za pravni lijek određuje se posebno za svaku stranku prema vrijednosti onog dijela odluke koji se pravnim lijekom pobija.
- (7) U statusnim sporovima, u sporovima za utvrđivanje i u sporovima u kojima se tužbeni zahtjev ne odnosi na novčani iznos, za plaćanje takse za pravni lijek, mjerodavna je vrijednost prema kojoj je plaćena taksa za tužbu.
- (8) Za pravni lijek koji se ulaže samo protiv odluke o troškovima postupka ili odluke o sporednim potraživanjima, taksa se plaća samo prema iznosu troškova postupka ili iznosu sporednih potraživanja.

IV – POSTUPAK ZA NAPLATU NEPLAĆENE TAKSE

Član 37

- (1) Ako stranka prisustvuje sudskoj radnji za koju je dužna da plati taksu, a ne plati je odmah, sud će je upozoriti da je dužna da taksu plati u roku od 8 dana i upozoriće je na posljedice neplaćanja takse (član 40). O izvršenom upozorenju sačiniće se zabilješka na spisu.
- (2) Na način iz stava 1 ovog člana postupiće se i kada stranka predaje neposredno sudu podnesak koji nije taksiran ili je nedovoljno taksiran, a na podnesku i na sudskom spisu će se naznačiti da je stranka upozorena na posljedice neplaćanja takse u roku.
- (3) Ako stranka ne prisustvuje sudskoj radnji za koju je dužna da plati taksu, sud će joj poslati nalog da plati taksu koju duguje u roku od 8 dana od dana dostave naloga i upozoriće je na posljedice neplaćanja takse u roku.
- (4) Za podnesak primljen preko pošte, a za koji taksa nije plaćena ili je plaćena nedovoljno, sud će podnosiocu poslati opomenu da plati taksu u roku od 8 dana od dan dostave opomene i upozoriće ga na posljedice neplaćanja takse u roku.
- (5) Ukoliko stranka u postupku ima punomoćnika, nalog, odnosno opomena za plaćanje takse iz stavova 2, 3 i 4 ovog člana dostaviće se njenom punomoćniku.

Član 38

Ako ukupan iznos taksa koje je takseni obveznik dužan da plati premašuje 1/3 njegovih mjesečnih primanja, sud može, na zahtjev taksenog obveznika, rješenjem odrediti da taksenu obavezu izmiri u ratama i to najviše u tri mjesečne rate.

Član 39

Kada je taksu dužno da plati lice koje ima prebivalište ili boravište u inostranstvu, kao i kada je taksu dužno da plati pravno lice koje ima sjedište u inostranstvu, a taksu nije platilo do trenutka nastanka taksene obaveze, sud će voditi popis neplaćenih taksa i po završetku postupka izdaće nalog za plaćanje takse u smislu člana 37 stav 3 ovog zakona, s tim da rok za plaćanje takse ne može biti kraći od 15 ni duži od 30 dana.

Član 40

- (1) Ako takseni obveznik ne plati taksu u roku određenom u članu 37 ovog zakona, sud će u daljem roku od 8 dana o neplaćenju taksi obavjestiti organ nadležan za poslove javnih prihoda radi naplate takse prinudnim putem, a na spisu će zabilježiti da je navedeni organ obavješten o neplaćenju taksi. Uz obavještenje sud je dužan da priloži dokaz o tome da je obvezniku upućen nalog, odnosno opomena o plaćanju takse.
- (2) Ako se radi o neplaćenju taksi u smislu člana 39 ovog zakona, sud će obavještenje iz stava 1 ovog člana dostaviti organu nadležnom za poslove javnih prihoda na području na kome se nalazi bilo kakva imovina tekstenog obveznika.
- (3) Po prijemu obavještenja u smislu stava 1 i 2 ovog člana nadležan organ će donijeti rješenje kojim će taksenom obvezniku naložiti da u roku od 8 dana od dana prijema rješenja plati dugovanu taksu kao i iznos od 50% visine te takse na ime kaznene takse. Ako takseni obveznik u datom roku ne plati dugovanu i kaznenu taksu, pristupiće se prinudnoj naplati.
- (4) Kaznena taksa iz stava 3 ovog člana ne može biti manja od dvostrukog iznosa najniže takse propisane Taksenom tarifom.

Član 41

- (1) Kada je takseni obveznik preduzeće ili drugo pravno lice sud će rješenjem utvrditi iznos neplaćene takse i iznos kaznene takse a rješenje će radi izvršenja dostaviti banci koja obavlja poslove platnog prometa i kod koje se vodi račun taksenog obveznika.
- (2) Protiv rješenja iz stava 1 ovog člana preduzeće ili drugo pravno lice može izjaviti žalbu u roku od 8 dana od dana dostavljanja rješenja. Žalba ne zadržava naplatu takse.
- (3) Žalba nije dozvoljena ukoliko je rješenje iz stava 1 ovog člana donio Apelacioni sud.

Član 42

Ako iznos neplaćene takse u jednom predmetu po izvršenju svih radnji, odnosno po pravosnažnosti predmeta ne prelazi iznos najniže takse koja se plaća za tužbu u parničnom postupku, sud neće pokretati postupak za prinudnu naplatu takse.

V – POVRAĆAJ TAKSE

Član 43

- (1) Lice koje je platilo taksu koju uopšte nije bilo dužno da plati ili je platilo taksu u iznosu većem od propisanog, kao i lice koje je platilo taksu za sudsku radnju, a ta radnja iz bilo kog razloga nije izvršena, ima pravo na povraćaj takse.
- (2) Lice koje je platilo taksu za sudsku radnju koja nije izvršena nema pravo da traži povraćaj takse za podnesak kojim je zahtijevalo njeno izvršenje.

Član 44

Zahtjev za povraćaj takse se podnosi na odlučivanje Osnovnom sudu u roku od 30 dana od dana kada je taksa pogrešno plaćena, odnosno od dana saznanja da sudska radnja nije izvršena, a najkasnije u roku od godinu dana od dana kada je taksa plaćena.

Član 45

Ukoliko prihvati zahtjev za povraćaj takse, sud će primjerak rješenja dostaviti i organu nadležnom za poslove javnih prihoda, radi izvršenja povraćaja.

Član 46

- (1) Ako u postupku u upravnim sporovima upravni akt po tužbi bude poništen ili ako u istom postupku odluka Osnovnog suda po žalbi bude preinačena ili ukinuta, ili ako se dozvoli obnova postupka, taksa za tužbu, odnosno žalbu će se vratiti stranci na njen zahtjev, a u slučaju preinačenja zahtjeva, stranci će se vratiti i stale takse plaćene u tom sporu.
- (2) Zahtjev za povraćaj takse podnosi se u roku od 30 dana od dana dostavljanja odluke iz stava 1 ovog člana.
- (3) U slučaju povraćaja takse iz stava 1 ovog člana primjenjivaće se odredbe člana 43 do 45 ovog zakona.

Član 47

U postupku za povraćaj takse ne plaća se taksa.

VI – NAČIN KORIŠTENJA SREDSTAVA OD NAPLAĆENIH SUDSKIH TAKSA

Član 48

Sve naplaćene takse predstavljaju prihod budžeta Distrikta.

VII – PRELAZNE I ZAVRŠNE ODREDBE

Član 49

- (1) Za podneske, radnje i isprave po kojima je takse obaveza nastala do dana stupanja na snagu ovog zakona, a taksa nije plaćena, plaćaće se taksa u skladu sa propisima i tarifom koji su važili do njegovog stupanja na snagu.
- (2) Ako je do stupanja na snagu ovog zakona plaćena taksa za radnju koja će se izvršiti poslije njegovog stupanja na snagu neće se plaćati nova taksa po ovom zakonu, niti će se vraćati više naplaćena taksa.
- (3) Ukoliko nakon stupanja na snagu ovog zakona Apelacioni sud ukine odluku Osnovnog suda koja je donijeta prije stupanja na snagu ovog zakona, neće se plaćati taksa za novu odluku Osnovnog suda.
- (4) Ako je u postupku, koji do stupanja na snagu ovog zakona nije okončan, takseni obveznik oslobođen plaćanja takse, dato oslobađanje važi i poslije stupanja na snagu ovog zakona.

Član 50

Danom stupanja na snagu ovog zakona prestaju se primjenjivati na području Distrikta propisi o sudskim taksama koji su se na tom području primjenjivali do dana stupanja na snagu ovog zakona.

Član 51

Ovaj Zakon stupa na snagu u roku od 8 (osam) dana od njegovog objavljivanja u "Službenom glasniku Brčko Distrikta Bosne i Hercegovine" a primjenjivat će se počev od 01. aprila 2001. godine.

Broj: 0-02-022-229/01
Brčko, 30. april 2001. god.

Predsjednik
Skupštine Brčko Distrikta

Mirsad Đapo, dipl.pravnik

Na osnovu člana 19. alineja 8 Poslovnika Skupštine Brčko Distrikta Bosne i Hercegovine, «Službeni glasnik Brčko Distrikt BiH» broj 1/00, donosim

O D L U K U
O PROGLAŠENJU ZAKONA O IZMJENAMA I DOPUNAMA ZAKONA O SUDSKIM
TAKSAMA BRČKO DISTRIKTA BIH

I

Proglašavam Zakon o izmjenama i dopunama Zakona o sudskim taksama Brčko Distrikta BiH, koji je usvojila Skupština Brčko Distrikta na 48. sjednici održanoj 29. augusta 2002. godine.

II

Ovu odluku objaviti u «Službenom glasniku Brčko Distrikta Bosne i Hercegovine».

Broj: 02-20/02
Brčko, 29. august 2002. godine

PREDSJEDNIK
SKUPŠTINE BRČKO DISTRIKTA

Mirsad Đapo, dipl. pravnik, s.r.

U skladu s članom 23 Statuta Brčko Distrikta Bosne i Hercegovine, Skupština Brčko Distrikta Bosne i Hercegovine na 48. sjednici, održanoj 29. augusta 2002. godine, usvaja

Z A K O N
O IZMJENAMA I DOPUNAMA ZAKONA O
SUDSKIM TAKSAMA BRČKO DISTRIKTA
BOSNE I HERCEGOVINE

Član 1

U tarifnom broju 19 Zakona o sudskim taksama Brčko Distrikta BiH («Službeni glasnik Brčko Distrikta BiH» broj 5/2001), iza tačke 2 dodaju se nove tačke 2a i 2b koje glase:

«2a Za rješenje o upisu u registar preduzetnika plaća se 100 KM.

2b Za rješenje o upisu promjene djelatnosti preduzetnika i druge nastale promjene plaća se 50,00 KM».

Član 2

Ove izmjene i dopune stupaju na snagu osmog (8) dana od dana donošenja ovog zakona.

Broj: 0-02-022-214/02
Brčko, 29. august 2002. godine

**PREDSJEDNIK
SKUPŠTINE BRČKO DISTRIKTA**

Mirsad Đapo, dipl. pravnik, s.r.

Z A K O N

**O IZMJENAMA I DOPUNAMA ŽAKONA O SUDSKIM TAKSAMA
BRČKO DISTRIKTA BOSNE I HERCEGOVINE**

Na osnovu člana 23 Statuta Brčko distrikta Bosne i Hercegovine, Skupština Brčko distrikta BiH, na 78. sjednici održanoj 19. novembra 2003. godine, usvaja

Z A K O N

O IZMJENAMA I DOPUNAMA ZAKONA O SUDSKIM TAKSAMAMA BRČKO DISTRIKTA BOSNE I HERCEGOVINE

Član 1

Zakon o sudskim taksama Brčko distrikta BiH («Službeni glasnik Brčko distrikta BiH» brojevi 5/01 i 12/02), u tarifnom broju 1 tačka 1 alineja 7 riječi: «ne više od 5.000,00 KM» zamjenjuju se riječima: «ne više od 2.000,00 KM».

Član 2

U tarifnom broju 19 iza tačke 2 dodaje se tačka 2c, koja glasi:

«2c. Za rješenje o upisu osnivanja udruženja građana, uključujući mjesne zajednice, plaća se 100 KM».

Član 3

Ovaj zakon stupa na snagu 8. (osmog) dana od dana objavljivanja u «Službenom glasniku Brčko distrikta Bosne i Hercegovine».

Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТА

Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

Broj: 0-02-022-432/03
Brčko, 19. novembar 2003. godine

PREDSJEDNIK
SKUPŠTINE BRČKO DISTRIKTA

Mirsad Đapo, dipl. pravnik